

方簡肅集
元

蘇平知學

PDG

方簡肅公文集敘

士君子才見於三代之下在豪傑壯

烈之氣足以奠國紀折奸萌歸然

如靈光砥柱斯無他一誠焉爾矣

在漢如汲長孺在唐如韓昌黎在

宋如田表聖劉元城胡澹菴諸君

子皆彌久而彌著曠數百年如立

乎一堂之上其文詞節槩猶磅礴
穹壤間不隨世銷亡歇滅彼豈聲
音笑貌云乎哉噫茲其遠者耳曷
觀乎近乃今於簡肅方松厓公徵
之矣公偉人也少負夙望至出處
則付之無心而猶毅不可奪蓋公
自遭遇之時周旋於嶺海積勞於

兵端鞅掌於討平經畧之務其大
者權黠之勢貂璫之焰一舉而熄
之氣完而力壯諸凡毀譽得喪無
足以動其中後雖屢進屢退屢薦
屢不就事君之日少報母之日長
士大夫不能脫公於瀟灑

國家不能進公於榮寵故年逾六袞

位躋六卿而平生忠孝皦如非秉
至誠以運之歟始弘德迄嘉靖初
見之章疏及簡什諸篇紆徐懇迫
類求益於人心世教其語同儕訂
學鑿鑿實際尤春容自得蓋自考
亭以來有原本流委如此不肖從
服宮審知先達如莆陽司寇彭公

卓矣公之節行匹之後二十年馳
躡於三山武夷之間得公里評籍
甚再後十年乃獲弛檐而公之

孫君謙善承先志來司予臬予藩
數十年嚮往幸爾拜交因益慨慕
先朝氣化老成所鍾信不偶然也已
公藏遺稿若干卷大叅君梓之以

傳小子不佞乃揭公先後盛大而
不朽者僭爲論略俾考文者溯其
本抑以爲世勵云

隆慶庚午春吉

賜進士第資政大夫奉

勅叅贊機務南京兵部尚書前浙江
提督學校副使翰林院庶吉士豫

章張鰲頓首拜書

方簡肅公文集後序

大叅方瞻厓君自豫章以書抵
茂曰先大父尚書簡肅公遺集
散失已久茲欲鋟梓以傳子其
為我校編之茂自髫年竊聞鄉
先生長者誦說尚書風節不置
廼今得盡讀其書於景行愫衷

有大愜焉遂不辭僭陋為之訂
其訛謬次其甲乙合奏疏序記
銘贊書啓諸作釐為十卷而以
姚司馬東泉公神道碑附焉庶
讀者得以尚論其世云既報命
予君復從而敘之曰乾坤正氣
浩然長存鍾于人則為道德為

節義為文章上下數千載惟孟
氏獨得其全故能壁立萬仞用
以紹聖緒陳王道七篇之言炳
朗鏗砉孰得而尚焉今學士大
夫操觚握管斧藻其詞類人人
能矣然多蠟外而窾中文肆而
質難於所謂浩然者索然餒也

一臨利害即選要蓄縮甘自墮
其平生雖有雕龍之辨輦悅之
飾亦奚取焉今讀簡肅公集迺
知公誦法孟氏而善養吾浩然
之氣云當

武廟時群奸煽簸前有劉瑾後有
錢寧竊太阿之柄以禍福諸搢

紳勢且薰灼而瀾潰矣迺公獨
奮孤騫之節前與瑾抗後與寧
角雖顛踣廢黜而不悔及

世宗中興簡命再臨公又以太夫
人在堂屢乞終養比刑書命下
而公已厭世乘雲矣孤忠至孝
終始弗渝此豈仙仙恣恣富貴

死生所能怵而動哉今其疏具
載此編試取而讀之猶使人凜
然有生氣其它論撰大抵多正
直雅醇無妍媸骯骯之態如贈
鄭都憲黃大理陳給諫諸篇則
出處之龜鑑也如覺軒狷齋諸
記則正學之標準也如厓門吊

古世忠小宗祠諸碑則倫紀之
敦敘也至於豫測寧庶人之變
及與王新建伍方伯論討逆事
宜則又老成謀國之石畫壯猷
也使公蚤登樞筦出其浩然者
以鎮衛

社稷保乂烝黎必有金石彛鼎之

勛獨其文足傳云乎哉

國朝文臣謚簡肅者惟公與安福
張公敷華為最著安福立朝較
久得君較隆而其屢觸權貴見
忤逆瑾則與公相伯仲節惠之
稱亦兩不忤矣昔王通氏論述
先訓至勤九載然其言多夸詡

若公斯集皆信而有徵大衆君
作求世德巍然負鼎鉉之望他
日濟美象賢於斯集且重有光
余不佞願竊覩其成云

隆慶庚午端月穀旦

賜進士第嘉議大夫河南按察司
按察使前戶科都給事中年家